

Ataatsimiinnerup ammarneqarnera

(Inatsisartunut sivisunerpaamik ilaasortaasimasut angajullersaat)

Inatsisartut 2012-imi ukiakkut ataatsimiinnerat maanna ammarneqarpoq, taamaalillunilu aamma qinigaaffimmi matumani ukiakkut ataatsimiinnerit kingullersaat ammarneqarluni.

Nuannaarutigeqara nuannersumik aasarsioreerluta nukissanillu nutaanik katersereerluta Inatsisartunut ilaasortaqaatika Inatsisartut ukiuata aallartinneranut matumunnga ullumi maanga ataatsimiittarfitsinnut tikilluaqqusinnaagakkit. Ataatsimiinnermi oqaluuserisassat pingaarutillit oqaluuserisussaavagut, neriutigaaralu suleqatigiilluarnitsigut angusaqarfiulluartumik oqaluuseriumaarivut.

Naalackersuisut inatsisiliortullu suleqatigiilluarnissaannik kissaateqarlunga taamatuttaaq Naalackersuisunut ilaasortat qamanga pisumik tikilluaquakka.

Taamatuttaaq nuannaarutigaara Inatsisartut Ombudsmandiat kiisalu Naalagaaffiup Sinniisaa tikilluaqqusinnaagakkit.

Taamatullu aamma tusagassiortut ataatsimiinnermik malinnaasut tikilluaquakka.

Nunatsinni isorartoqisumi nunaqqativut tamaasa TV-kkut, radiukkut inatsisartullu nittartagaatigut Inatsisartut ataatsimiinnerannik malinnaasut pinngitsoorusunngilanga aamma tikilluaqqussallugit.

Ilisimatitsissutigissavara Inatsisartunut Naalackersuisunullu ilaasortat tamarluinnangajammik ataatsimiinnerup ammarneqarnerani najuummata.

Inatsisartunut ilaasortaq Juliane Henningsen meerartaarnerminut atatillugu sulinngiffeqareerluni Inatsisartunut uteqqippoq. Tikilluaqqigit.

Inatsisartunut ilaasortaq Jane Petersen Inuit Ataqaatigiit meerartaarnerminut atatillugu sulinngiffeqarpoq taamaattumillu sinniisussamik ataatsimiigiaqqusisoqarnissaa Siulittaasoqarfiup akuerisimallugu.

Taamaaliluni Kaali Olsen maannamut Juliane Henningsenimut sinniisuusimasoq maanna Jane Petersenimut sinniisutut ingerlaannassaaq.

Taamaalillunga maanna aamma inassutigaara Kaali Olsenip ulloq 21. september 2012-imiit Jane

Petersenimut taassuma meerartaarnerminut atatillugu sulinngiffeqarnerata naanissaata tungaanut sinniisussatut Inatsisartut ataatsimiinnerannut peqataanissaa Inatsisartut akuerissagaat.

Akerliusoqarnerluni.....

Kaali Olsen, Inatsisartuni inissannut ingissinnaavutit.

Inatsisartunut ilaasortaq Malik Berthelsen Siumut ataatsimeeqataanngilaq Naalagaaffiit Peqatigiit ataatsimeersuarnerannut peqataanini pissutigalugu.

Pisarneq malillugu Inatsisartut sinnerlugit Ataqqinartorsuaq Dronning Margrethe ilaqutaalu, danskit Folketingiat, Savalimmiuni Lagtingi, Islandimi Altingi Nunavummilu inatsisartut Inatsisartut ukiuanni nutaami pitsaasumik suleqatigiittuarnissamik kissaateqarlunga inuulluaqqussuteqarfigaakka.

Taamatut oqaaseqarlunga najuuttut tikilluaqqoqqippakka. Neriuppunga ataatsimiinnivut pitsaasumik inerititaqarfiusumillu ingerlakkumaarivut, ataatsimiinnermilu anguniakkavut angujumaarivut.